

Aasakut nalunaaquttap atorunnaarsinnissaa suliniutigileqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraatit)

Akissuteqaat

(Naalakkersuisut Siulittaasuat)

Aappassaanneerpeqarnera

Aasakut nalunaaquttap siuartinneqartarnerta atorunnaarsinnissaa pillugu aalajangiiffigisassatut siunnersuut, Inatsisartunut ilaasortaq Justus Hansen-ip Demokraatineersup saqqummiussaa pillugu, Inatsisartut Inatsisinut Ataatsimiititaliaata isumaliutissiissuteqarneranut Naalakkersuisut qutsavigaat.

Naalakkersuisut maluginiarpaat Inatsisinut Ataatsimiititaliap isumaqatigiittup aalajangiiffigisassatut siunnersuutip akuerineqarnissaa inassutigigaa.

Aasaanerani nalunaaquttamut siuartitsisarnermut tunngasut assigiinngitsut Inatsisinut ataatsimiititaliap misissorsimavai. Ilanngullugu ilaatigut aasaanerani nalunaaquttamik siuartitsisarnermut tunngaviusoq, suut pissutigalugit taanna ullutsinnut naleqqukkunnaarsimanersoq, kiisalu EU-ip piffissami qaninnerusumi aasaanerani nalunaaquttamik siuartitsisarnerup atorunnaarsinnissaa eqqarsaatigigaa.

Siunnersuutip siullermeerneqarnerani saqqummiunneqartutut, EU-mi aasaanerani nalunaaquttamik siuartitsisarnerup atorunnaarsinneqarnissaannik pilersaaruteqartoqarneranut atatillugu, nunatsinni aasaanerani nalunaaquttamik siuartitsisarnerup atorunnaarsinneqarnissaa pissusissamisuussaaq. Taamaattumik Naalakkersuisut siunnersuummut akuersaartumik inissisimapput.

Aalajangiiffigisassatut siunnersuutip akuerineqarnissaa pillugu Inatsisinut Ataatsimiititaliamit isumaqatigiilluni inassuteqaat tunngavigalugu, Naalakkersuisut sinnerlugit oqaatigissavara Naalakkersuisut ataatsimiititaliap inassuteqaataa tusaatissatut tigummassuk. Aalajangiiffigisassatut siunnersuut akuerineqassappat, aasaanerani nalunaaquttamik siuartitsisarnerup atorunnaarsinneqartussanngorlugu Naalakkersuisut iliuuseqassapput.

Taamatut oqaaseqarlutik Naalakkersuisut siunnersuut Inatsisartuni suliassanngortippaat.